



Pranuar / Dorezuar Priljena / Priljena Received / Delivery	29. 12	2021	1	viti god year
Organ / Njësia Org / Unit	Nr Prot Br Prot Prot No	Shtesa Prilog Appendix	Sasia Kolicina Quantity	
SKDMSHCK	6392/2021		1/4	



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.998/2021

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Jeton Koca-kryetar, Ardita Haxhnikaj-Demi dhe Arben Mehmeti-anëtarë, dhe Avdyl Bektashi-Zyrtar i Lartë për Bashkëpunim Profesional në cilësinë e procesmbajtësit, kanë shqyrtuar ankesën me numër A.nr.998/2021 të datës 03.12.2021 të parashtruar nga ankuesi _____ ne adresë fshati Bardhosh, rruga "Mehmet Devaja", Nr. 38 në Prishtinë, kundër Vendimit me Nr. 61/2021 të datës 12.11.2021 të Menaxherit të Personelit të Ministrisë së Kulturës, Rinisë dhe Sportit, në çështjen juridike "kërkesë nga marrëdhënia e punës", duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datën 29.12.2021, mori këtë:

V E N D I M

- I. Refuzohet si e pabazuar ankesa me numër A.nr.998/2021 e datës 03.12.2021 e parashtruar nga ankuesi _____
- II. Mbetet në fuqi Vendimi me Nr. 61/2021 i datës 12.11.2021 i Menaxherit të Personelit të Ministrisë së Kulturës, Rinisë dhe Sportit.

A r s y e t i m

Ankuesi _____ më 03.12.2021, fizikisht ka parashtruar ankesë me Nr.Prot:5789/2021 në Këshillin e Pavarur Mbikëqyrës për Shërbimin Civil të Kosovës, me pretendimet ankimore që vendimi për deklarim të statusit të zyrtarit publikë është nxjerr në kundërshtim me Ligjin për Zyrtarët Publikë dhe Rregullores Nr. 10/2020 për Deklarimin e Statusit të Zyrtarit Publikë.

Këshilli i Pavarur Mbikëqyrës për Shërbimin Civil të Kosovës, bazuar në dispozitat e Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e

Pavarur Mbikëqyrës për Shërbimin Civil të Kosovës, më datë 08.12.2021 ka dërguar kërkesën për përgjigje në ankesë tek Ministria e Kulturës, Rinisë dhe Sportit, ndërsa më datë 10.12.2021 kemi pranuar përgjigje në ankesë nga Ministria e Kulturës, Rinisë dhe Sportit.

Kolegji për Shqyrtimin dhe Vendosjen e Ankesave, për marrjen e vendimit meritore ka administruar këto prova: Ankesën me Nr. Prot:5789/2021 të datës 03.12.2021 e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Vendimin Nr. 75 i datës 30.11.2021; Akt Emërimit të datës 20.10.2012 të ankuesit; Vendimin Nr. 39/2019 i datës 04.02.2019 i Komisionit të Ankesave të MKRS; Vendimin Nr.61/2021 i datës 12.11.2021 i Menaxherit të Personelit të Ministrisë së Kulturës, Rinisë dhe Sportit; Kërkesën për përgjigje në ankesë e datës 08.12.2021; Përgjigjen në ankesë e datës 10.12.2021 dhe Listën për deklaram të statusit të zyrtarit publikë.

Kolegji për Shqyrtimin dhe Vendosjen e Ankesave, për vendosjen e kësaj çështje, pasi ka shqyrtuar të gjitha shkresat e lëndës të parashtruara nga palët, ka konstatuar që ankesa e ankuesit është e pabazuar, sepse:

Bazuar në provat e lëndës, ankuesi në bazë të Akt Emërimit të datës 20.01.2012 është i punësuar në pozitën "Vozitës" në Departamentin e Administratës Qendrore në Ministrinë e Kulturës, Rinisë dhe Sportit. Menaxheri i Personelit i Ministrisë së kulturës, Rinisë dhe Sportit më datë 12.11.2021 ka nxjerr Vendim me Nr. 61/2021 me të cilin ka bërë deklaramin e statusit të zyrtarit publik për ankuesin duke e kategorizuar ankuesin në Nëpunës Administrativ dhe Mbështetës.

Ankuesi në ankesën e parashtruar në Këshillin e Pavarur Mbikëqyrës për Shërbimin Civil të Kosovës, pretendon që vendimi për deklaramin të statusit të zyrtarit publikë është nxjerr në kundërshtim me Ligjin për Zyrtarët Publikë dhe Rregullores Nr. 10/2020 për Deklaramin e Statusit të Zyrtarit Publikë, sepse na është ndërruar statusi nga nëpunës civil me akt emërim në nëpunës administrativ dhe mbështetës.

Bazuar në provat e lëndës, po ashtu edhe në dispozitat ligjore të aplikueshme në fuqi në kohën e themelimit të marrëdhënies së punës së ankuesit, respektivisht Ligjit Nr. 03/L-149 për Shërbimin Civil të Republikës së Kosovës, pozita "Vozitës", sipas nenit 4 paragrafi 4 nuk është konsideruar si pozitë e shërbimit civil pasi që është konsideruar si pozitë për kryerjen e funksioneve mbështetëse dhe të mirëmbajtjes, siç parashihet: *"Personeli i punësuar nga institucionet e administratës në nivel qendror dhe komunal, përgjegjës për kryerjen e funksioneve mbështetëse dhe të mirëmbajtjes, nuk janë nëpunës civilë"*, kështu që për zbatim të këtij neni të këtij ligji më datë 08.12.2014 Ministria e Administratës Publike ka nxjerr Qarkoren Administrative e cila ka rregulluar pozicionin e vozitësve, duke konstatuar që pozitat e vozitësve nuk janë pozita të shërbimit civil, në këtë rast edhe pse ankuesi ka mbajtur akt emërim për pozitën e tij, sipas legjislacionit të lartcekur kjo pozitë nuk ka hyrë në kategorinë e pozitave të shërbimit civil.

Me hyrjen në fuqi të Ligjit Nr. 06/L-114 për Zyrtarët Publikë dhe Rregullores (QRK) Nr.10/2020 për Deklaramin e Statusit të Zyrtarëve Publikë, institucionit e administratës publike në



bashkëpunim me Departamentin për Menaxhimin e Zyrtarëve Publikë të Ministrisë së Punëve të Brendshme, kanë qenë të obliguara që të bëjnë deklarinimin e statusit të zyrtarëve publikë, siç është përcaktuar me nenin 83 të Ligjit Nr. 06/L-114 për Zyrtarët Publikë, konkretisht paragrafi 5 i këtij neni, përcakton se: *“Një person, që mban një pozitë të Shërbimit Civil sipas Ligjit të Shërbimit Civil (03/L-149), e cila nuk është pozitë e Shërbimit Civil për nga funksionet dhe përgjegjësitë e saj sipas këtij ligji, do të përshtatet (rregullohet) me statusin e duhur të punësimit të përcaktuar sipas këtij ligji (punonjës i shërbimit publik, zyrtar i kabinetit, staf administrativ dhe mbështetës). Nëse personi refuzon të hyjë në këto marrëdhënie të tjera të punësimit, do të lirohet, sipas ligjit, nga Shërbimi Civil”.*

Kolegji për Shqyrtimin dhe Vendosjen e Ankesave, referuar kësaj dispozite, po ashtu referuar edhe dispozitave të Ligjit Nr. 06/L-114 për Zyrtarët Publikë, me të cilën është paraparë pozita vozitës, konkretisht nenit 2 paragrafi 6 të Ligjit Nr. 06/L-114 për Zyrtarët Publikë, i cili përcakton se: ka përcaktuar që: *“Nëpunës administrativo-teknik- dhe mbështetës është zyrtari publik, që kryen veprimtari ndihmëse, të mirëmbajtjes, ruajtjes, vozitjes, si dhe veprimtari të tjera të ngjashme në institucionet e administratës publike”*, ka konstatuar se pozita e ankuesit me dispozitat e Ligjit Nr. 06/L-114 për Zyrtarët Publikë është kategorizuar si nëpunës administrativo teknik, andaj sipas kësaj Menaxheri i Personelit i Ministrisë së Kulturës, Rinisë dhe Sportit, duke pasur parasysh edhe listën për deklarinimin e statusit të zyrtarëve publikë të dërguar nga Departamenti për Menaxhimin e Zyrtarëve Publikë të Ministrisë së Punëve të Brendshme, ka nxjerr Vendimin me Nr.61/2021 të datës 12.11.2021 për deklarinimin e statusit të zyrtarit publikë për rastin e ankuesit.

Kolegji për Shqyrtimin dhe Vendosjen e Ankesave, konstaton se Vendimi me Nr.61/2021 i datës 12.11.2021 i Menaxherit të Personelit të Ministrisë së Kulturës, Rinisë dhe Sportit për deklarinimin e statusit të zyrtarit publik për rastin konkret të ankuesit, është nxjerr në pajtim me nenin 2 paragrafi 6, nenin 83 paragrafi 5 të Ligjit Nr. 06/L-114 për Zyrtarët Publikë, nenin 5 të Rregullores (QRK) Nr.10/2020 për Deklarimin e Statusit të Zyrtarëve Publikë, mbi bazë të kësaj pretendimet ankimore të ankuesit që vendimi për deklarinim të statusit të zyrtarit publikë është nxjerr në kundërshtim me Ligjin për Zyrtarët Publikë dhe Rregullores (QRK) Nr.10/2020 për Deklarimin e Statusit të Zyrtarit Publikë, sepse na është ndërruar statusi nga nëpunës civil me akt emërim në nëpunës administrativ dhe mbështetës, është pretendim i pabazuar.

Duke marr parasysh të gjitha shkresat e lëndës dhe provat e bashkëngjitura në lëndë, Kolegji për Shqyrtimin dhe Vendosjen e Ankesave, bazuar në nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, vendosi si në dispozitiv të këtij Vendimi.

Vendi hynë në fuqi ditën e nënshkrimit nga Kryetari i Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti Administrativ, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A nr.998/2021

Avdyl BEKTESHI
Procesmbajtës



Jeton KOCA
Kryetar i Kolegjit

Vendimi i dërgohet

- Ankuesit
- Sekretarit të Përgjithshëm të Ministrisë së Kulturës, Rinisë dhe Sportit;
- Udhëheqësit të Njësisë së Burimeve Njerëzore në Ministrinë e Kulturës, Rinisë dhe Sportit dhe;
- Arkivit të KPMSHCK-së.

